

Presidente Dieter F. Uchtdorf

Maikadua a Mammagbaga iti Umuna a Pangulu



Panagdisso a Sitatalged iti Daga iti baet ti Naungor a Panawen

Saan pay unay a nabayag addakami iti asawak a ni Harriet iti airport a mangbuybuya iti panagdisso iti daga dagiti nangangayed nga eroplano. Naangin nga aldaw idi ket pugpugsuan ti narungsot nga angin ti umas-asidegen nga eroplano, a mangigapu iti panagsueken panagbaribar ti tunggal maysa iti panaglandingda.

Bayat ti panangpalaliwmi iti daytoy a panagkarigatan iti nagbaetan ti nakaparsuaan ken makina, nalagipko ti mismo a panag-trainingko iti panagpatayab ken dagiti prinsipio a naadalko idiay—ket idi agangay insurok iti dadduma a piloto iti trainingda.

“Diyo ipapilit ti kayatyo nga aramiden ti eroplano iti naungor a panawen,” kunak kadakuada. “Agtalinaedkayo a kalmado; dikayo agdanag. Ipokusyo ti matayo iti nakasentro a linia ti runway. No sumiasika manipud iti tinarigagayam a papanan a dalan, agaramidka iti naannad a panagatur. Agtalekka iti kabaelan ti eroplanom. Pagtalinaeden a nakatayab ti eroplano agingga nga umawan ti angin.”

Maawatan dagiti addan padasna a piloto a saanda a kanayon makontrol dagiti banag a mapasasamak iti lawlawda. Dida basta mapasardeng ti panagungor. Dida mabalina a pagpukawen ti tudo wenno niebe. Dida mabalina a pasardengen ti angin wenno isiasi ti turongenna.

Ngem maawatanda met a biddut a pagbutngan ti panagungor wenno napipigsa nga angin—ken nangnangruna

ti saan a pannakabael nga agaksion gapu kadagitoy. Ti wagas tapno makapagdisso ti eroplano iti daga a sitatalged no saan a nasayaat dagiti kasasaad ket ti panagtalinaed iti umisu a dalan ti eroplano agingga a mabalina.

Bayat ti panangbuybuyak iti maysa nga eroplano kalpasan ti kaudian a panagdissona a kasaruno ti maysa pay ken nalagipko dagiti prinsipio a naadalko manipud kadagidi tawenko kas maysa a piloto, napanunotko no awan ngata ti leksion iti daytoy para iti aginaldaw a panagbiagtayo.

Ditayo kabaelan a pengdan dagiti bagyo a masaranggetayo iti dalantayo. No dadduma saan a mapasamak dagiti banag a kayattayo a pagbalinanda. Maburiborantayo kadagiti rigat ti pannakapaay, panagduadua, panagbuteng, panagliday, wenno pannaka-stress.

Bayat dagita a panawen, nalaka a mairaman iti amin a banag nga agbalin a dakes ken nakapamaysa iti panunot-tayo dagiti riribuktayo. Ti sulisog ket agpokus kadagiti panubok a pakaipasasanguantayo imbes nga agpokustayo iti Mangisalakana ken ti pammaneknektayo iti kinapudno.

Ngem saan a dayta ti kasayaatan a wagas tapno mali-siantayo dagiti pannubok iti biag.

Kas iti panangpatalinaed iti pokusna ti addan padasna a piloto saan nga iti bagyo no di iti sentro ti runway ken ti umno a punto ti pagdissuan ti eroplano, tapno makapag-pokustayo iti sentro ti pammatitayo—ti Mangisalakantayo,

ti ebangheliona, ken ti plano ti Nailangitan nga Amatayo—ken iti kangrunaan a panggeptayo a tun-oyen—maka-pagsubli a sitatalged iti nailangitan a pagtungpalantayo. Nasken nga agtalektayo iti Dios ken agpokustayo iti panagaramid kadagiti banag a nasken nga aramiden ti maysa a disipulo. Pagtalinaedentayo ti mata, puso, ken panunot-tayo iti panagbiag iti wagas nga ammotayo a nasken.

Ti panangipakitayo iti pammati ken panagtalektayo iti Nailangitan nga Ama babaen ti panagtungpaltayo a sirarag-o kadagiti bilinna ket mangyeg kadatayo iti ragsak ken gloria. Ket no agtalinaedentayo iti dalan, marimbawantayo ti ania man a panangungor—kasano man ti kapigsa daytoy—ket makasublityo a sitatalged iti nailangitan a pagtaengantayo.

Nalawag man dagiti tangatang iti aglawlawtayo wenno napno man daytoy iti napuskol nga ulep, kas disipulo ni Jesucristo, sapulentayo nga umuna ti pagarian ti Dios ken ti kinalintegna, iti pannakaammo a no aramidentayo daytoy, amin a banag a kasapulantayo ket maitedto iti kamau-dianan (kitaen iti Mateo 6:33).

Anian a napateg a leksion ti biag!

Ti ad-adda a panangipokustayo iti rigrigattayo, iti panagkarigatantayo, iti duaduatayo, ken iti panagbutengtayo, ad-adda met a narigrigat ti pagbalinan dagiti banag. Ngem ti ad-adda a panangipokustayo iti maudi a nailangitan a papanantayo ken dagiti rag-o iti panangsurot iti dalan ti disipulo—panagayat iti Dios, panagserbi iti pada a tao—ad-adda met a naballigiantayo nga agibtur kadagiti panawen ti riribuk ken panangungor.

Patpatgek a kakabsat, kasano man ti kinarigat ti panagbiagtayo, ti ebanghelio ni Jesucristo ti kanayon a mangidiaya iti kasayaatan a dalan iti natalged a panagdissotayo iti pagarian ti Nailangitan nga Amatayo.

PANANGISURO MANIPUD ITI DAYTOY A MENSAHE

Balacadannatayo ni Presidente Uchtdorf nga “agta-lek iti Dios ken agtalinaed iti dalan ti kinadisipulo a mangipamaysa kadagiti aramidntayo a panagkagumaan.” Pagsaludsodam dagiti sursuruam no kasano a naka-pagtalinaedda a nakapokus “iti maudi a nailangitan a pagtungpalantayo ken kadagiti rag-o ti panangsurot iti dalan ti kinadisipulo” kadagiti panawen a naipasangoda kadagiti pannubok. Mabalimmo ida nga awisen

a mangpanunot kadagiti wagas a makapagpokusda iti pammaneknekda ken makapagpokusda ken Cristo kadagiti narigat a kanito ken sikakararag nga ikeddengda no kasano nga ipatungpalda ti maysa wenno ad-adu pay kadagita a kapanunotan iti panagbiagda.

AGTUTUBO

Maysa a Pundasion para iti Pammaneknekko

Ni Jennifer Weaver

di agtawenak iti 16, immay ti maysa a gayyem iti pagtaenganmi a kaduana dagiti misionario. Iti uneg ti makabulan ti umuna a paglilinnawagan, nasungbatan a silalawag ti amin a saludsodko. Nariknak a nagpaneknek ti Espiritu Santo maipapan iti kinapudno dagiti mensahe maipanggep iti Pannakaisubli. Kasla saan a maipada iti ania man a banag a nariknak idin, ken am-mok a pudno amin daytoy.

Nupay kasta, napadasak ti ad-adda a pannakapadisi ken pannakasuppiat ngem idi kasakbayanna. Nariknak ti kinaagmaymaysak, nabannog, ken matiktikaw. No naaramidko met ti umno a banag, apay a maipaspasangoak iti adu a panagrigrigat? Diak maawatan idi nga agpaay a pagsayaatak dagiti pannubokko. Insuro idi kaniak dagiti misionario nga agayuno ken agkararagak, uray iti tengnga ti aldaw a panagklase. No diakon kabaelan nga ibturan dagiti banag ibukbokko no kua ti kaunggak ket dagus a mariknak ti panangliwliwa ti Espiritu.

Dayta a lawas a panagbuniagko ket napnuan iti pannubok. Binutbutengnak ti bossko nga ikkatennak iti trabahok no diak liklikan ti panagbuniagko ket adda maysa nga isukatna, idi agangay naospitalak gapu ta adda bato dagiti pantogko, ket kiniddaw dagiti nagan-nak kaniak a pumanawak iti pagtaenganmi. Gapu ta diakon makontrol dagiti adu a banag, ti laeng kakaisuna a maaramidko ket umasidegak iti Apo.

Tunggal maysa kadagita a pannubok ket *nagbalin* a pagsayaatak. Nakatulog dagitoy kaniak a makasursuro maipapan kadagiti doktrina ti ebanghelio, a nangipaay kaniak iti pundasion para iti pammaneknekko.

Agnaed ti nagsurat iti Idaho, USA.



Inordenan ti Dios ti Kallaysa

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawatyo iti “Ti Kaamaan: Maysa a Waragawag iti Lubong” ket mangpadakkel iti pammatiyo iti Dios ken mangbendision kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

I tultuloy dagiti propeta, apostol, ken dadaulo a “sipapasnek a mangipakdaar nga inordenan ti Dios ti panagkallaysa ti lalaki ken ti babai ken ti kaamaan ti kangrunaan iti plano ti Namarsua.”¹

Ni Elder D. Todd Christofferson ti Korum dagiti Sangapulo-ket-dua nga Apostol kinunana: “Ti maysa a kaamaan a nabuangay iti kallaysa ti maysa a lalaki ken ti maysa a babai ket mangipaay iti kasayaatan a pagyanan tapno dumur-as ti plano ti Dios. . . .

“ . . . Awan kadaytoy wenno ti asino man a mortal ti makapagbalbaliw iti daytoy a nadiosan nga urnos ti kallaysa.”²

Ni Bonnie L. Oscarson, sapisap a presidente ti Young Women, kinunana: “Tunggal maysa, ania man ti kasasaadda iti panagasawa wenno bilang dagiti annak, ket makapagbalin a salaknib iti plano ti Apo a naidadawan iti waragawag ti kaamaan. No plano ti Apo daytoy, nasken a daytoy met ti agbalin a planotayo”³

Intuloy ni Elder Christofferson: “Sumagmamano kadakayo ti napaidaman iti bendision ti kallaysa gapu iti kinaawan namnama, panagrayo iti kapada iti katatao, kaadda ti pagkurangan iti bagi wenno panunot, wenno kaadda iti panagamak

a mapaay. . . . Wenno mabalina a nagasawakayo, ngem naggibus dayta a panagasawa. . . . Sumagmamano kadakayo a naasawaan ti saan a maikaipasngay kadagiti ubbing. . . .

“Uray pay no kasta, . . . makatulong ti tunggal maysa iti pannakapasamak ti nadiosan a plano iti tunggal henerasion.”⁴

Dagiti it Mainayon a Nasantuan a Kasuratan

Genesis 2:18–24; 1 Taaga Corinto 11:11; Doktrina ken Katulagan 49:15–17

Estoria dagiti Sibibiag

Ni Kabsat a Larry M. Gibson, sigud nga umuna a mammagbaga iti sapisap a panguluen ti Young Men, nalagipna idi imbaga ni Shirley, asawana itan:

“Ay-ayatenka gapu ta ammok nga ad-adda nga ay-ayatem ti Apo ngem siak.’ . . .

“Nagsalpot iti pusok dayta a sungbat. . . .

“ . . . [Ket] kayatko a kanayon a mariknana nga ay-ayatem ti Apo a kangrunaan iti amin.”⁵

Insuro ni Elder David A. Bednar ti Korum dagiti Sangapulo-ket-dua nga Apostol: “Ni Apo Jesucristo ti kangrunaan a paset ti relasion iti

panagasawa iti katulagan. . . .

[Panunoten a] nakapuesto ti Mangisalakan iti tuktok ti [maysa] a trayanggulo, nga adda ti maysa a babai iti pagbatayan ti maysa a suli ken ti maysa a lalaki iti pagbatayan ti sabali pay a suli. Ita panunoten no ania ti mapasamak iti relasion ti nagbaetan ti lalaki ken ti babai bayat ti panagtultuloy a ‘yaasidegda ken ni Cristo’ ken mangikarigatan nga agbalinda a ‘naan-anay Kenkuana’ (Moroni 10:32). Gapu ken babaen ti Man-nubbot, ad-adda nga agassideg ti lalaki ken ti babai.”⁶

DAGITI NAGADAWAN

1. “Ti Kaamaan: Maysa a Waragawag iti Lubong,” *Liahona*, Nob. 2010, 129.
2. D. Todd Christofferson, “Why Marriage, Why Family,” *Liahona*, Mayo 2015, 52.
3. Bonnie L. Oscarson, “Defenders of the Family Proclamation,” *Liahona*, Mayo 2015, 15.
4. D. Todd Christofferson, “Why Marriage, Why Family,” 52.
5. Larry M. Gibson, “Fulfilling Our Eternal Destiny,” *Ensign*, Feb. 2015, 21–22.
6. David A. Bednar, “Marriage Is Essential to His Eternal Plan,” *Liahona*, Hunio 2006, 54.

Ibilang Daytoy

Kasano nga agmaymaysaak ken agtultuloyak a mangikarigatan nga “umasideg ken ni Cristo”?